

共同經課 - 1 撒母耳記下一章一節，十七節~二十七節

1 掃羅死了，也大衛劊死亞瑪力人倒來的時，大衛住佇洗革拉二日。17 大衛做哀歌，追悼掃羅及伊的子約拿單，18 閣講將此個哀歌教示猶大人。此個哀歌名叫「弓歌」，寫佇雅煞珥的冊。19 歌講：以色列啊，你的榮顯者受劊佇山頭！唔啊，英雄的死到按呢啊！20 莫得佇迦特報告；莫得佇亞實基倫的街路報揚；驚了非利士的查某囡仔歡喜；驚了無受割禮的人的查某囡仔大悅。21 基利波山啊，願無露水無雨！佇你遐也無出禮物的田！因為佇遐勇士的盾牌受穴擲；掃羅的盾牌親像無受抹油的。22 對受劊者的血，對勇士的油，約拿單的弓無倒退；掃羅的刀無空空倒轉。23 掃羅及約拿單——活的時通疼，通歡喜的，死的時也無分離——in 比鷹鳥卡緊，比獅卡強。24 以色列的查某子啊，著為著掃羅啼哭！伊曾互恁穿朱紅色來歡喜，互恁的衣服有黃金的妝飾。25 勇士怎樣倒佇戰陣！約拿單受劊佇你的山頭。26 我的兄約拿單啊，我為你傷心！我盡在歡喜你！你的疼我，真奇妙，贏過婦仁人的疼。27 勇士死到按呢！戰器毀滅到按呢！

共同經課 - 2 詩篇一百三十篇

1 [上崎仔的詩。] 耶和華啊，我對深淵求叫你！2 主啊，求你聽我的聲！願你俯耳孔聽我懇求的聲！3 主——耶和華啊，你若究勘罪惡，是誰倚會住？4 總是你有赦免的恩，欲互人敬畏你。5 我聽候耶和華，我的心神啲聽候；佇伊的話我有向望。6 我的心神聽候主，比守更的人，聽候天光卡切，比守更的人，聽候天光卡切。7 以色列啊，你著向望耶和華！因為佇耶和華有慈愛，佇伊有豐盛的救贖。8 伊的確救贖以色列脫離伊一切的罪惡。

共同經課 - 3 哥林多後書八章七節~十五節

7 今恁仔凡事親像信心、口才、智識、攏總的熱心，以及恁的疼阮，諸個事既然充滿，就佇此個恩惠也著充滿。8 我講按呢，唔是命令恁，是對別人的殷勤來試驗恁仁愛的實在。9 因為恁知咱的主耶穌基督的恩：伊本好額，為著恁成做喪鄉，欲互恁對伊的喪鄉，來成做好額。10 我佇此層事將我的意見互恁知，因為這是恁的利益；是恁對舊年已經提倡此個事，唔若做前行，也做前甘願，11 今著做成此個事。致到恁既然有熱心的甘願，也照所有的來成伊。12 因為已經有此號熱心，就得著接納，是照人所有的，唔是照人所無的。13 卻唔是愛別人聊量，恁豁達，14 是愛得平平，現時將恁有剩的補 in 的無夠，通將 in 有剩的補恁的無夠，按呢才會平。15 照所記載講：捨多的無剩；捨少的無欠。

共同經課 - 4 馬可福音五章二十一節~四十三節

21 耶穌坐船閣過去彼旁，歸大陣的人聚集就近伊；彼時耶穌佇海邊。22 有一個管會堂者，名做睚魯來，已經看見耶穌，就仆佇伊的腳下，23 切切求伊，講：「我細漢的查某子差不多欲死，請你來用手按伊，互伊得著救，來活。」24 耶穌及伊去。歸大陣的人隨伊，真挨夾。25 有一個婦仁人，血漏十二年，26 曾對多多的醫生受著多多艱苦，閣一盡破費伊所有的，若是無一絲仔利益，反轉愈傷重。27 聽見耶穌的事，就來佇眾人中，對伊的後面來摸伊的衫，28 因為講：「我干單摸伊的衫，就會好。」29 對按呢血漏連鞭止；本身知伊的病疼已經好。30 耶穌即時家已知有權能對伊出，就越轉身佇眾人中，講：「是誰摸我的衫？」31 伊的學生給伊講：「你看見歸陣人啲挨夾你，猶久問『是誰有摸我』？」32 耶穌遍遍看，愛看做此個事的婦仁人。33 婦仁人知本身所歷過，驚惶愕愕，就來仆佇伊的面前，攏照實給伊講。34 伊就給伊講：「婦仁人啊，你的信已經救你，通安然倒去！你的病全然好。」35 啲講的時，有對管會堂的家來，講：「你的查某子死啦，乜使猶啲勞煩先生？」36 耶穌邊仔聽見所講的話，給管會堂者講：「莫得驚，只有著信！」37 耶穌佇彼得、雅各，及雅各的兄弟約翰以外，唔准別人隨伊相及去。38 到管會堂的家；看見有嘩嘩啞，也有啼哭大聲啞的人，39 已經入去，就給 in 講：「恁啥事嘩嘩啞啞啼哭啊？囡仔唔是死，是啲暈若定。」40 in 就恥笑伊。若是伊趕 in 眾人出去，就導囡仔的父母以及及伊來的人入囡仔所住的所在，41 就牽囡仔的手，給伊講：「大利大，古米！」(翻譯就是講：「查某囡仔，我命令你起來！)」42 查某囡仔連鞭起來行。因為伊十二歲啦；眾人就大印愕奇怪。43 耶穌嚴嚴禁戒 in，莫得互人知，就吩咐著互查某囡仔食。